

رمضان محمد سليمان

مع نفسي

أشعار بالعامية المصرية

الطبعة الأولى ٢٠١٧

بطاقة الكتاب

عنوان المؤلف : مع نفسى
المؤلف : رمضان محمد سليمان
التصنيف : أشعار بالعامية المصرية
رقم الإيداع : 2017-28625
عدد الصفحات : 100 صفحة
رقم الإصدار الداخلى : 95
تاريخ الإصدار الداخلى : 12 / 2017 طبعة أولى
تصميم الغلاف والتنسيق : دار النيل والفرات للنشر والتوزيع

جميع حقوق الطبع والنشر محفوظة للشاعر، ولا يحق لأى دار نشر
طبع ونشر وتوزيع الكتاب الا بموافقة كتابية وموثقة من الشاعر

دار النيل والفرات للنشر والتوزيع

سجل تجارى : 13242
بطاقة ضريبية : 165-5-00031-572-01-35
رقم التسجيل : 2017-7 544-662-202
E-mail: alnile waalforat@yahoo.com
twitter: النيل والفرات
youtube: alnile waalforat@yahoo.com
facebook: alnile wa alforat
هاتف : 01011256943 - 01116202218 - 01202541192
الشرقية - العاشر من رمضان - مجاورة ١٣ - عقار ٣٠٤ - الدور الثانى - أمام سنتر ١٣



الإهداء

لزوجتي وأولادي
أخويا وبناتي ولأمي وأبويا
لكل اللي ميت وف القلب حيّ
لكل الأحبه قرايب وصحبه
لصاحبي المسافرين
وكل اللي عافر وعایش ف حي
لطفولتي وأجمل ذكرياتها
وللدنيا بكل مغرياتها
لكل اللي عدى ولبكره اللي جيّ
اسيبكم مع نفسى
يارب تعجبكم حروفي

رمضان محمد سليمان

عدت سنين بُعْدَكَ

عمّاله تجري السنين

وأنت كما كنا

حبك ييملى البيت

سيرتك إذا ما حكيت

صورتك عليها السبح

متعلقه ع الحيط

صوتك ويوم الحصاد

والزرع مالي الغيط

كل الحاجات ماتغيرتش

كل الآهات والذكريات

لون السنين باهت

لمة عيال تاهت
والسكه ملضومه
وسايبلي يابا الخيط
فاكر ك ومحتاجك اوى
وف كل مارس بافتكر ليلة الوداع
وأنا باتعصر وأنا باتلوي
وأنا باحضنك والروح بتطلع للسما
وعشم وحب وخوف بيوجع إنما
مطر الدموع نازل مشاع
يومها ابتدى زمن الدراع
كان ابويا يوم مايلمنا الستة العيال
وعشان ما أنا ديك البرابر ؟
كان لازم اتحمّل واميل
عايزين تقضوا العيد في إيه ؟
كان ابويا بيه ..

كان كل يوم يلبس جакته

وكرافته وبوت جديد

وسايبني بأكل ف الحديد

علشان عنيد

قُصر الكلام

كل البنات

عايزين هدوم زي البنات

ولإننا ف الريف عادات

كان أبويه يعمل كام حكاية

وفى النهايه

العيد يفوت زي اللي فات

البت لابسه البنطلون وحزام

زاره الزراير والقميص كروهات

والشعر سايح ع الكتاف يا سلام

لو هاعترض ويقول لي هات

كنت ابقى شايط لكن البقاء للأقوي

وهو رب البيت

أنا كنت أحب الغند واتحاييل عليه ألعب

كان لما يغضب؟

كانت عيونه الخضرا بتنور

كان من جنونه بعد اما يتهور

وتهدي روحه وراسي تتعور

يسكت ويضحك وسط عماتي

والكل يضحك حتي أمي واخواتي

قلبه الحنين يجيني متحير

يصالحنني بالحكمه أو تكمل العلقه

علشان ما أنا اتغير

مانا كنت لسه صغير

واهو عدي قد العمر عمر واكثر

ولسه ما اتغيرت

ولسه عايش في الراكور البيت

لو كنت فاكّر اننا نسينا ؟

تبقى انت فعلا سيبتنا ومشيت

تبقى انت فعلا سيبتنا ونسيت

شهر مارس

يابني لسه الجو بارد
يابني لسه الصيف ماجاش
دفي نفسك ليه معاند ؟
كنت أزيد وكتير از ايد
عايزه إيه ؟ (ماتضيقتناش)
كنت فاهم إني محتاج حبها
كنت نايم ف العيون وف قلبها
وأهي لفت الأيام يامارس
ولا حد قال اي شئ
ولا حد حنّ وبلّ ريق
ولا حد أصلا حس بيّ
غيرها هيّ

طب هيّ فين ؟

فين الطريق ؟..

وكبرت وانت بخير يامارس

ونسيت حصص كل المدارس

إلا القصص

إلا الزعيق المستخبي وراه حناك

مانسيتنش حاجه ولسه حاسس

والله فاكرك زي ما انتي !

زي بنتي

زي القمر

زي القدر والرب حارس

طوّلتني خالص ف الغياب

وطفولتي لسه معلقه رغم الشباب

وليالي مارس والمذاكره والاستعاب

□ أنا جبت لك ورده

والعطر على كارت المعايدة
ماتفوتيش العيد والضحكه والضمه
ماتكنسلش مواعيد الفرحه واللمه
مستني يا مه بدون معانده
مارس معاند زيّ بالفهم المقطر
مارس كبر يا مه والههم بقا اكرر
واحشاني بالقلب البرئ
وواحشني حضنك والزعيق
وحاجات كتيره صغيره مالياني شوق
جنبك هاروق ..
ونودع انا وانتى الشتا من غير قلق
مارس خلوق ..
محتاج هدوء
محتاج لحضن يكون بطيء

محتاج طريق وانتي الطريق
انتي الحبيبہ والصديق
وحشاني يامه

أم الدنيا

يا أم التاريخ الحجر
والباقي كذب وفُشِر
يا أم الإيمان بالقدر
يا اخت الوصايا العشر
سفر الشتات ان جبر
كان لسه ناس ع البرّ
من عهد موسى النبي
ولحد يوم الحشر
بتروحي .. و تقربي
و تبوحي وتطبّي
وتقولِي بعد الشر
هو انتي ليه مسّله
للضلمه عز الضهر

والا انتى مستسلمه
علشان ندوق القهر
هو انتى اصلك كدا ؟
والا انتى متقيده
البطن حبلى رضا
من غير جواز ولا مهر

يا مه العيال كتروا
وبيركبوا المترو
ما تيا لله نلحق أدان
أو بكره من تترو
يا ام السنين عاجزه تبعت لنا فرحه
او حتي تنوي العدل وتغير الطرحه
يا حنينه بالأوى وبكل أميه

الصبر بقى مستوى
والنخله مش طارحه
هاتخطي بكره ازاي ؟
وبخطي كاتبه الجاى ؟

ساييه النصيب بيقول
القدره فيها الفول
وسيجاره ويا الشاي
ع النيل بكام ذكرى
هاتعدي على فكره
عيش بس يومك كده
سيب بكره على بكره
الأرض محروسه
لو عايشه مخروسه
والرأى ع المصطبه

والحظ ف الدوسه
وتملي محبوسه
يرحم زمان انقضي
بقى كله بالمنفضه
واللي ينول الرضا
يتعشي بسبوسه
والقرع لما اهتدى
اترقى بقا كوسه
ش الله يا ننوسه
جوا المقام مش ولى
ولا مكى ولا مؤصلي
ماتقومي ياعروسه
الدنيا ملبوصه
ياتهزي يا تطبلي
يا تموتي وتبطلا

يا تفوقي م النومه
أحلامنا مفرومه
وعيالنا مسمومه
يا أم التاريخ وانتهى
عايزين نقوم قومه

روبابيكيا

انا عندي حاجات عايز ابيعها
م الماضي ونشفت منابعها
أيام العمر اللي قضيتها
من غير ما اهتم بمواضيعها
قرب يا بتاع الروبابيكيا ..
خُذ كل حياتي وماتخليش
خُذ رحلة عمري ف شوارعها
أدخل ومعاك كل حاجاتك
وياريتني ما احسش وحياتك
واعمل معروف اشتال وامشي
خد أيها حاجه بتحلاك
خد جرس الباب

علشان كداب
ديما بيرن بدون أحباب
هو البواب أوقات يجي
من غير أسباب .

خُد ساعة الحيط
ما بقتش باقابل بني آدمين
أصوات عقاربها بيملئ البيت
وف نص الليل عمالي كمين
واسهر للفجر مع العفاريت
من غير لا مراسم ولا تأمين
ونعيد ونزيد أيها حواديت
فبقوم اتوضي وأنام ساعتين
والحق أيام عشتها ف الغيط
واشهى وكأني غريق ف محيط

وارجع للوحده بجرح غويط
تعبااان .. مليت
أنا عايز حد شفيع وامين
لو حتى هايدعي وارد أمين
عندك تابلوه وسط البراويز
جواها طريق ملين دهاليز
خد كل شهايدي ونياشيني
واستني ! هاودع حد عزيز
ف الصورة تاريخي وأعمالي
واتنين حراس زي خيالي
والتالت علمني أتعامل
وبفضله الغالي بقيت عالي
هاديلك مفتاح عربيتي
وملف الخدمه وترقيتي
خد حتى هدومي وتفاصيلي

لوينفع لاديلك بيتي
إيه رأيك تشتري كام ذكرى
مش قادر انساهم على فكره
واديني بدالهم أيها شئ
إديني طريق
أو سيبني غريق
ف بحور بكره
ما ترد ياواد
مش سامع غير حاضر طيب
مش ناوي تفاصيل وتعيب
أو تعمل مش عاجباك حاجه
وإلا انت ضميرك تلاجه
والمكسب مضمون وقريب
سيب ركن حاجاتي اللي حاجزها
مصحفي والسبحه ونضاره

طبعاً سجّادتي أنت عايزها
طمعان ف الدنيا الغداره
خيبان مسحور وبغرايزها
مش شايف العبره ويا خساره
طبع الأيام زي ما هو
والبني آدمين تحت الطاره
بتلف عليهم وتعدى
ودا حالها هاتفضل دّواره
النّشاري مفكرها شطاره
والبايع مهموم مش مرضى
والمكسب طعم ف سناره

أرض النفاق

صريح لكن مليش أصحاب
ولا مسلط حروفي كلاب
تُعْض الكلمة فوق سطرِكَ
وتبعت فتوى م المحراب
صحيح جايز ماكونش دياب
ولا مسجل ديوان وكتاب
لكن شايفك وليك قدرك
وليا لكل حد جواب
جريح سَكَن ف قلبه عتاب
ومستعجل ونبضه شباب
ماتغرش بلون شعرك
وتتكى وتمضي غياب
يا عم اتلم شعرك شاب

وقول الحق ليه بتهاب
وقرب بحرها لبحرك
وقولها ثاني نص هباب
وليه راجع بدون أسباب
تقول آسف وسدي الباب
تقدم ورده فوق عذرك
وتطلب قاعده مع عناب
اكيد نقد الصبايا عذاب
وطبل وزمر م الأحباب
وجايز ينتهي عمرك
لو اتلايمت على القبقاب

فعيب جدا تكون مُغتاب
وتعمل حيطه جوا دولاب
تبان مغلوب على أمرك

وتتحايل على الدحلاب
يكون واسطه ورسول وغراب
يكون بوسته وصول كداب
بيشحت حرفه م المتحف
وينحت نصه م المصحف
ومرسل و الهوى غلاب
ودين أمه قانون الغاب
مفيش منه لأنه إن تاب
هيوحي إليه ملهوش حساب
وكل الخلق بعده سراب

يا عم اتهم واستنصف
دي لسه عايزه تتعرف
وهب تطب تبقى شراب
وترمي النص ع المصرف

وبعد شويه تتشرف
وتتصرف وتتثقف
وتأخذ نقطه م الكتاب
على النص اللي لسه م طاب
وصاحبه بوحيه لسه م جاب
من المصحف دليل كفرك
نفاق ورياء ووسط كداب

فين الغلط

بعد السنين ما اتدورّت
وقلوب كثيره اتغيرت
انا عمر ساعتي ما اخرت
دايماً زماني بيشتترط
مسألش امته ومين غلط؟
دايماً غلط
بانحت غدايا م الزلط ..
وباقول مسيرها تنظبط
رغم الكفوف اللي اتهرت
وقلوب بقسوه اتشفرت
أيوه القلوب اتظفّرت
حتى مشاعري اتكسرت

واتكررت
والذكريات اتفجرت
ولاشمعه فيها عمّرت
ولانجمه حتى نورت
الماضي مات
والذكريات اتدهورت
حتى الصور جوا الشنط
طلعت غلط
والابتسامة اتبخّرت
ومرايتي ليا كشرت
يمكن ملامحي اتغيرت؟
يمكن عنيا اللي افترت؟
يمكن أكون فعلا غلط
فعلاً غلط

متلخبط ليه ؟

القلم الفضه اللي اتوضي

من دمع عنيك صلى وقضى

ما سألشي عليه

كان ماشي عليه

القلب المخنوق من تاجه

ولآخر نبضه فى إنتاجه

بيخاصم وقت ما تحتاجه

يا سعادة البيه

مش عارف ايه ؟

شغل الألابنده وحاوريني

وريتك امتى توريني

عشمان وياريتك تبريني

متكثف ليه ؟
فكرت ف ايه ؟
من بكره تغيّر مواعيدك
وتعدّل نسخة مواليديك
وتنام وسلاحك على ايدك
والحلم أن جالك تقضي عليه
روحك هاتساعدك وتزيدك
وجروحك ندبه ف تفاصيلك
بركة أيامك مواويلك
والدمع يفارق مناديلك
والفرح تعيشه وتمسك فيه
مش عارف ليه وهاتعمل ايه؟
شمس الأحلام ضيّها باهت
والفرحه اللي ف بالك تاهت
من يوم ما رضيت تفضل ساكت

على ظلم الحب وطول لياليه

عمّال بتحرفن ع المعنى

واتمايل يمكن تسمعنا

أرجوك بحروفك متعنا

وبلاش ف الحب توقعنا

وتعدى ماتسألش عليّ

وتشوف الأشواق ف عنيا

وتسيب جمهورك يوجعنا

طول عمر الحرف مجمعنا

والروح بتروح لو غيبت عليه

ربك لطف !

ربك لطف
والقطر منزلش البلد
ولا هد حيط
ولا خش بيت
طب ليه وقف ؟
ساعة الإجابة من الأبد
مالهاش مغيت
ولا كات وكيت
ولا بالصُدْف
دا القبر مستني المدد
إشي كان غتيت
ودا كان حويط

ودا كان هدف
ودا كان ولي ودا كان ولد
ودا زرع غيط
ودا عقد بيت
كله اتخطف
راح للأبد
والعطل مش عيب ف العدد
العطل كان فكري السليط
والكل متصنف عبيط
1..2 حدا بالعدد
من غير اسف
ربك لطف

هُمَا الْكَلِمَتَيْنِ

من يوم ما شُفْتُكَ
والحب متعشم بخير
والقلب بتعلم يطير
والدرس طَوَّلَ حَبَّتَيْنِ
وهما هما الكلمتين
اصبر...1

يومين ..2
عدت سنه عدت سنين
هافرد جناحي لحد فين ؟
وانا لسه مانسيتش الضفاير
والبشايير والعنين
وانا لسه شايل ف الكتاب الوردتين

مش قادر اسيبهم عطشانين
ولا عايز اشوفهم دبلانين
عمّال احايل ف الغياب من حين لحين
مايقتش طايّل حب شاب
ولا وعد كتباه بالايدين
طب رُحتي فين؟
وانتى اللي قلتى الوعد دين

وانه الدفا وقت الندى
وانه الحنان والاشياق
حلفت له حبك مش رياء
الواد مكديش النداء
خد حلمه شاهد للاتفاق
وف علمه مضمون الوفاق
ودا كان غباء
كل السكك متسدده
الواد ايديه متقيده
والحمل زاد بعد الخناق
والحلم بيضحى بولاء
مشنوق بيضحك للقضا
من غير هدى
وقع الولد ف المصيده
سلم رقبتة للعدا

جھڑ حبیبہ للفراف

وفا كان غباء

كلام و خلاص

كلام فاضي ملوش لازمه

لكن عاده نقول ونعيد

ماعدش لحزننا مواعيد

مافيش نيه نقابل عيد

وناخذ صورته للأقصى

وهو سعيد

كلام فاضي !!

كلام فاضي مالوهش أساس

لكن عاده نقول تقارير

ونعلن بكرة جاي تغيير

ونبني الكذب ف عقولنا فضيله وخير

نربي عيالنا ع الخسه

وظلم الغير
كلام فاضي
كلام فاضي وماهوش ببلاش
لكن عادہ .. ما دمنا أخوات
بنسمع بعض ونعدي السبع سموات
ونوفي الوعد لوحتي ناكلها فتات
فهمنا الفوله والقصه
مفیش بینا لآخذ ولا هات
كلام فاضي
كلام فاضي بلاش منه
وعادي أخواتنا بيمنوا
ولآزم لآجل ما يحنوا
نهؤي شويه وننقّض
منثورجشي ونعرّض
اكيد المولى بيعوّض

كفاية ان احنا نور ننه

كلام فاضي

اتخذت

ويدوب صحيت من نوم طويل
يجي 100 سنه او قد يزيد
ف سرير حديد ومفیش بديل
غير يعني أفتح عقلي حبّه واستفيد
ايه يجري بس ان قالوا عنى باجرّ ديل
وبنام كتير ومراتي سارحه ع السكك
ويا الشقي
ويا التقى
ويا الفقير ويا العويل
وها تفرق ايه شئ مش جديد
ما أنا ياما قلت
ويا ما عدت

ويا ما فكرت ف بديل
ويا ما شلت
ويا ما هلت
ويا ما كدّبت الدليل
اسكت بقى على قسمتي وللا أعمل إيه؟!
وأنا لسه ساند ع النهار بعيدان غياب
وبواقي ليل
وأنا لسه شايف باب بلدنا بيتفتح
والخوف وراه
ويا 1000 آه
على فجر تاه
على كوم عيال
على بخت مال
على كل حال.. ؟
الكل قال

قالولي مراتك الخبره مع الجدعان
في عربيه بتجري بسرعه مجنونه
نواحي النيل .

سألت النيل ؟

لعت الليل

عملت نبيل

ماصاقتش

مادقتش

ماحققتش

بكل بساله ورياله

قتلت قتيل (وكان ابني)

خربت الدار

خيانه وتار

وطبل وزار ومين بختار

يعيش فيها

يعيش ليها
يعشيها بدون ماتميل
بلاش تمثيل
وهم تقيل

محدث جبى من ماله
محدث خبى لعياله
محدث عبي ف شواله
غير اللي ضحكه مواله ف ليلة عيد

ماعدش كسوف

لكن إمته وأنا وانتى متباعدين

سنين باعد وأنا قاعد ما بين البين

لا أنا سهران ولا سكران

ولا قاصد قمر هايبان

وبتلحك لطيف عدي ولا هدى

واعاتب ورده ع الألوان

وذنبى أنا ايه وقلبي ف تيه

وحبي بيعشق التوهان

و عايش بس ف الأحلام

مافيش ولا دمعته حقيقه

مافيش ولا شمعته مطفيه

ولا حروف الغرام قالت
ولا رجعتلي ولا طالت
ولا صالت ولا جالت
ولا بلت جفون العين
وبين البين
أنا وحببتي متفقين
لا أنا سامع ولا راجع
ولا بايع غرام وحنين
وقلب حببتي مستني اقولها له
هاقولك ايه؟
وانا دايب بقالى سنين
ومن كتر البعاد والشوق
نسيت قلبي اللي عايش فوق
ماتتجنيش
على القلب اللي كان جنبك

وبيحبك ومش مكسوف

لكن إمتة

وأنا وانتي مابيننا فروق

كفاية عليك

كفاية عليك يا عم الطُّهر والنيه
حليب مغلي بنار هاديه
كفايه عليك دا هم وقهر ادميه تسيب
الجنه دار فاضيه
ومش حاسين
ملكش ف ايه ؟
بتحكي لمين ؟
دا ظاهر قلبك الطاهر وقع ف كمين
وسامع من بُكا حرفك وجع وأنين
ومين غيرك يشيل الطين
ويحصد دمع بالفدادين
ويحسد روحه ع النفسين

ومين مع مين ومين كان فين؟!
مصدق نفسك المخدوشه بالطيبه
مضيّق راسك المطبوشه يا نهيبه
مفرق حسك الواعي على الغربان
على الواطي وع العريان
وليه ساكت على نفسك مادام عارف
ومتعلم كتير ياما م الدنيا اللي زي البير
وفيها الندل بتحكم
متنطق ؟
قولها واتكلم
وهات القصه م الآخر
ولا تميل ولا تاخر
وبيع الندل بالعُمله
ميزان العدل بالجمله
معدش لا أصلي ولا فاخر

فماتدورشي ع المكسب

بنقد حروفك الساخر

هاتتعب قد ما تتعب

اكيد التجره خسرا نه

في دنيا شربتها مقلب

وماتحسبتش ولا خانه

وتطلع روحك الطاهره ماهيش طاهره

وتبقى جروحك الظاهره ماهيش ظاهره

وتبقى نهايتك المفروضه تتنحي

لأن الفرض والسنة خلاص بحه

وحتى العاده دوريه وبقت عاهره

يغور الحب لو هايقل من صاحبه

اكيد القلب مش هايضل لو صاحبه

يموت الحرف والأحلام وكل جميل

خلاص يا جميل ماعدش بديل هاتلعبه

متسألشي دا يطلع ايه
مفیش ولا حاجه تستاهل
وبكره نشوف ونتقابل
ونلعن سلسفيل بعده
ومن قبله ومن بعده
ماحدثش فينا بقا قابل
يعيش القصه متغمي
يقرب يمه من يمي
ويحمد ربنا ويتوب
ماحدثش قالها اتلمي
يا دنيا تعبنا بزياده
وليه ويانا عناده
كفايه الرحمه موجوده
ف ليه القسوه متعاده
كفايه يا دنيا

تتجوزيني؟.

ماتيا لله نلحق وقتنا
ونلم شوقنا وحبنا
ونعيش بقى!
ماتيا لله نسرق فرحنا
ونداوي آهة قلبنا
بساعة لقا!
ماتيا لله نتجوز بقا
ولا فرق سن وتريقه
الحب هو الملتقى والمشنقه
قصر الكلام حبك شقا
والراحه لمة شملنا
قلقانه ليه على شكلنا ؟
اتنين وجمعنا الهوى مع بعضنا

اتنين ودوقنا الهوى شوق بُعدنا
اتنين حبايب والي دايب زينا
ينسى العوازل والي نازل بحلقه
ماتيا لله نتجوز بقا
عاشق حنانك همهمه على سوسنه
شايفك في قلبي من سنه
انتي الحياه وانتى الهنا
انتي اللي جوايا أنا
مقطوعه كل الألسنة
الحب مفهوش كام سنه ..
ماتيا لله نتجوز بقا
حيرانه ليه نبقا سوا ؟
والله لمتنا الدوا
والعمر راح يبدأ هنا
مع قلب مليان بالهوى

ماتيا لله نتهنى بقه
شمس المحبه مشقشقه
كل الاحبه في اللقا
يتمنوا احساس حبنا
أو حتى نظره منا
ماتيا لله نتجوز بقا
وإلا انتي ناويه ع الشقا
هتفرطي ف حبي أنا
والذنب؟ أصغر كام سنه
وتعيشي ويا اللانا .
وتموت حكاية حبنا
واموت بشوقي والمُنَى
والله حبك مشنقه
والعفو عندك واللقا
ماتيا لله نتجوز بقا

العید مجاش

هووووووس

سمع هُس

كلنا مليار ونص يعني هس

يعني مووت وإياك تحس

يعني عيش عاجز وبس

اشتري عمرك بالملك

البضاعة مالکها لص

باعنا فيها ماتحبسش

رصنا فوق بعض رص

قدسنا مابقتش قدس

النزاع بين اخوك وعمك

يعني عنك شوف وبص

واجتمع اشجب ونُص

النصوص على طاولة جيس

دموع ودم و لتر ببيس

ف التلاته مين يهمك

امريكان ويهود وروس

خد دروس وكفايه لحس

أيوه لحس وسعر بخس

لسه مين غير أبوك وأمك

السنه دي العيد مجاش ؟

واللي فات

واللي قبله

واللي طالع ع المعاش

لوسألته شافه مره ؟

تلقى عمره راح

بلاش

العرب عيدهم مجاش
من سنين والفرح باش
من بداية الإنكماش
التطبع والتنطع والنقاش
يعني اسكت
حد قادر يشتريه توب قماش
حد فاكّر
غير جراح مش لاقيه شاش
السنة دي العيد مجاش

بدون مونتاج

بدون مونتاج ولا إخراج ولا تمثيل

هايمشي الحال ويطوح شمال ويمين

وخذ بالك من التحليل

متعودشي ع الأحزان هاتدمنها

وتندم لو ف يوم فرحك اخد منها

عشان تنسى .

كفايه عليك كاسين الصبر آخر الليل

ولو لسه معاك الحق والأحلام متسهرشي

وخذلك آيه م القرآن اكيد هتنام

ماتلعبشي مع الأيام وتستني اللي عدى بيان

وم الأول ماتحلمشي في كنا وكان

عشان الروح ماتتعبشي من التوهان
ومن فضلك وبعد الاذن والإيمان
تغطى الفكر بالبشرى وتتفائل
وعبي الذكر من بكره
وعيش حبه بدون عائل
مهيش مهدوده واتاقل
مصمم ليه تكون أنت بدون تغيير
ما تيجي نجدد النيه بحبة خير
نصلي الفجر من بكره وننوي صيام
ماتهربشي تقول تعبان
تقول ولهان
تقول الصبر كاسه ملان
ومين فينا اللي ماسكرشي من الأحزان
تعالى نربي أفكارنا بنات أطهار
تعالى تعبي اعدارنا سكات ووقار

نكمل باللي باقي يقين
نحاول يا لله قول يامعين
ماتستكرشي على نفسك تكون إنسان
تكون الأصل في الصورة
وتخلع عينك العوره
وتلمح فرحتك بغنيك بدون مونتاج
ومش لازم تكون (#) هشتاج !!
وقصة جديده مشهوره
كفايه انك تكون إنسان
معاه العيبه محظوره بدون مونتاج

قلبي أنا

يا قلبي اللي راقد في بركة هموم
ماعدشي اللي زيّك مالكشي لزوم
كفايه علينا زهورنا حنينا
وشيلنا ونسينا
ونفس الكلام
بفرقه وخصام
وحبة عتاب مغمس بلوم

يا عيني اللي سهرت تعدّ النجوم
لامتى دموعك هاتفضل رسوم
لصبح استخبي
في حضن الاحبه

وطال بغيره ورافض يقوم

يا عمري اللي عدى ماکملش يوم

ملکفت سنيني بنفس الهدوم

مشتت أملنا

ف جتة عيالنا

وواقف قبالنا وحالف تزوم

...

..

..

تايه

م الأول دق القلب

وخفت أحب لا أضيع

واموت مجروح

واديني باموت وجراحي

بتعزف لحن حزين

وحبيبي بيضيع

من أيدي وقلبي بينزف

ليه يا حبيبي رايح فين ؟

م الأول دق القلب

وخفت لايجي اليوم واتوه

واديني تايه مش لاقى

غير الدمع بنادي عليه ...

بلاش تجرحني
وبلاش م الحب !
إن كان الحب هو الجرح
هو الدمع
هو الآه
بلاش م الحب
ان كان الحب راح يخدعني
وبلاش الشك
عشان الشك كله خداع
نهایتہ وداع
ولو في قلبك ليه كلام
لو في قلبك ليه ملام
قولي ومتصدقش كل الكلام
دا الكلام آخره خصام
وبلاش الخصام وليكي من قلبي السلام

مع نفسي

وبقابل نفسي بدون م احتاج
علشان مش واخد ع المواعيد
عيان وصفولي الحزن علاج
وهاجيبه منين والقلب وحيد ؟
ومراية الحب العميانه
ساقياتي المُرّ وعطشانه
من غير ما توقف ولا دمه
عمري ما حسيتك يوم سامعه
لاهياني الشمعه السكرانه
مع ضيّ الفجر على البرواز
خلقت حدوته بطلها مجاز
وسؤال متكرر ماسألتوش

وجواب متأكد إنه فشوش
مش أيها حزن علاجه جواز
متسعر ختمه بكام ملطوش
أنا قابل نفسي ولي مزاج
اسمع حوادث شمعته وخلصت
وامنع احاسيسي اللي اتحبست
واتجنن واضحك على نفسي
وماحسش تاني لو اتكسرت
مش عيب على فكره ان أنا مخدوع
ولا حلمي ف بكرة يكون ممنوع
كل الموضوع ؟
اطلع مع نفسي بدون عكاز
مش كسر إزاز مغسول بدموع
ولا قلب بتاج وحنين مقتول
ولا حزن بخيل وقت ما يتعاز

يهرّب ويسيبني لنفسي ملاذ
يهرّب ويسيب شرح البرواز

طريق الشوك

وكل ماتمشي ف زياده

تبص لفوق !

بعشق وحب وارده ؟

تبات مخنوق !

هتلقى الخطوه معتاده

خلاص مابقتش سجاده

لأنة قلبك المهتوك

ملفك حسن سير وسلوك

وقصة حب متعاده

لقيس لبنى

وموت العشق ف قلوبنا

وطرح الجرح لو تُبنا

على الشجره اللي مزروعه
ف أول دخلتك ع الشوق
يمين بالله شمال بالذوق
ماهيش زينا ولا توبنا
هاتلقي الشرق متهجّر
وتلقى الغرب متأجر
شمال وجنوب شريط أخضر
براح مزنوق
ما بين زرياب وسيف زهراپ
فماتغنيش !!!
ولا تبكي بعيون بغداد
وتحكي بكذب عن أمجاد
وساعه حداد
بلال فوق ظهر دبابه
حبيبتك يا بني كدابه

ونيلة النيله ع النسوان
شبه عواد
اللي متعين وليّ وعراف
وبلسان الهوى بيقول
يا نور عيني بقيت ملبوس
عواف يا كابوس
داجيل ورا جيل
ومية نيل ..
وهدة حيل . شبعنا لبوس
وماشي وإيدي ف اديها
كما القواد
اريح نفسي ف عينها
وادوس ع الشوك اعيها
وأنا.....
أنا المخنوق

مرهونه أشواقی

بعد الكلام ما انتهى

ومسكت اشواقی

اكـد لي قلبي إنها..

نبضي وترياقی

مهما هاقول عنها

ما تكفي اوراقی

نـبع الحـنان حـضنها

وف غيرها مش لاقی

طـبع الـوفا منها ...

مهد لي أخلاقی

أنا عشقي ف المنتهى

لملمتي اشلانى

مسحور أنا بلحنها
زلزلي اعماقي
طبطب بريق ننھا
على خدش كان باقي
شحن المشاعر فرح
غصن البشائر طرح
جوايا طاب قطفها
وبقيت هاويس واتفتح
على رملها النائي
ف عنيا سكنتها
دوّاره يا سواقي
على غنوه لحنّتها
من وحي اشواقي
من كتر ما عشقتها
ساعدوني اعدائي

كل الكلام تهتها
ليه رافضه تشتاقي ؟
وأنا قلبي داب نهنها
ومعالي ترياقى

حب أخرس

قالوا البعيد ع القلب هو البعيد ع العين
وأنا وانتى رغم الوفا عايشين ومش عايشين
آه من ملامح فرح ساكن خيال روحي
امتى نحسّ الدفا مع بعض لو ساعتين

عارفك وعارفاني من إمته وأنا مُخلص
روحك بتهواني وغرامنا مُستخلص
رقعت حزني وجع على لهفه مزعومه
وقفت عيني أمل على لقطه مرسومه
وأنا وانتى رغم الصفا جوانا صوت أخرس
إيه يعني قلبي الغبي - اه والنبي - عاشق تجاعيدك
همسك ونبضك صبي عطشك وتنهيدك

متوهمه الأفراح والحسبه ماتساوي
متقسمه الايام معدوده وأنا ناوي
فكي اللجام قربي مستني مواعيدك

صدقهم

عادي جدا صدقيهم
لو قالوك عني حاجه
واني طيب واني أولى
واني خايف م المحاوله
كل حاجه وليها حاجه
إلا حكم بدون مداوله
فاكره حُبك ليّ عمله ؟
والا حظف زهر طاوله
والا خايفه عليكي مني ؟
وانتي ننّ العين علاوله
كل قوه وليها حول
وانتي حُبك فيّ دوله

عشت فيها غصب عني
قلت أغني ؟ خسرت جوله
عادي جدا صدقيهم

محمد مات

كده من سكات ؟
وأنا لسه سايبك من يومين
تعملها وتسبب الحياه
طب كنت اشوفك ؟
كان لسه عندي كلمتين
محتاج اقولهم لك أوي
يمكن تأخر رحلتك
يمكن تقوم من علتك
يمكن أجهز لك فرح
وال(نعمه) وياك الفرح
والذكريات
كده من سكات ؟

دا أنا لسه مارجعتش يا واد
وبقولوا مات !!
حقا صحيح ؟
طب فين (حنين) ؟
وها تعمل إيه ؟
البت لسه صغيره اوي ع البعاد
مش حمل يُتم وبهدله
ولا ليها تُقل على السواد
اياكش فاكّر يوم ما شبّكنا الايدين
الوعد دين
الفاتحه مين هايحلها
غيرك يا واد
والطرحه مين هايحطها
ف سنين حداد
ها تغيب خلاص ؟

من غير ما تشبع من (حنين)
وتشوفها رايحه المدرسه
وتشوفها عايشه كويسه
وتخاف عليها تهسها
وتجيب لها أخين ولاد
ملعون أبوه الاشتياق قبل البعاد
ولحزن الحظ بقيت مشتاق
محتاج لك ترجع أو اجيلك
نقلبها خناق
(ياخي بايخه حكاية انك ميّت
وكفاية هزار)
دا أنا لسه ماصدقتش انك...
جيت جنب الدار
والله بحبك مش فاكّر من امته وليه
والناس ف الشارع حابينك

وصحابك جم بالعريه
فاكرين أيام الطالبه
ما ترد يا واد ...
والا انت بقيت بتنفذلي
علشان عدت
مش عايز حاجه من الدنيا
رُحت ما رديت
للحزن ميلاد
أنا فاكرك نكته وبتضحك
ونعست شويه نسيت جرحك
كده برضو يا اخويا ومتقولشي
الله يسهلك ويسامحك
وينور درجات على قبرك
وتشوف الجنه وتتهني
وتسلم على كل احبابنا

وابقى ابعت روحك طمنا

مستني معاد

الدعاء بالرحمة والمغفرة.... لفقيد الشباب

محمد أحمد فؤاد إبراهيم ...

مايهمكيش

محتاج اقولك كلمتين عني
عارف دماغك واللي جواها
عارفك ولسه همومي شايلها
لكن لابد تكلمي الخانه
(ميهمكيش (&) الطيش)
لو واخده ع الشواكيش
دول كلمتين بشويش

(1)

مايهمكيش الليل
والقهوه خلصانه
فيه ألف حاجه تسهرك

مايهمكيش النيل
والأرض عطشانه
ف عيوني دمع يخضرك
مايهمكيش الجيل
لو قالوا بخلانه
وماكانش لازم يخسرك
مفروض علينا نقدرك
لكن مفيش
وهاتخدي إيه مني
وأنا مين هايضمني
وإيه يضمّني ؟
إنك صحيح مافكيش
غير حب مايكفيش
آسف بجد متزعش مني

(2)

الطيش طريق مش مختصر

بعد اذنك هاسلكه كام يوم

حتى انتهاء الليل

الطيش غريق زي الشجر

عزم السمك ع العوم

حين اشتواء النيل

الطيش صديق جاي م السفر

شبعان وجع وهموم

من غربه هاده الحيل

وما عدش ليّ سبيل

غير كلمتين شيلتهم

لأجل الحنين قولتهم

مهمكيش الطيش

لأن أنا المتهم

أنا نازل

ياللي إنت مش عايز تشارك
ومعلّي صوتك عليه
أنت اللي ناوي المعارك
والظلم لاجل التكيه
و نهار معالي جنابك
فى الصيف مكيف متكتك
والشعب هو اللي جابك
طمعان ف رحمة سيادتك
هو انت مش حد عادي ؟
والا ماحدش بقولك
شمّت فينا الاعادي
والدم سايح ف ضلك

أبو زيد ماعشّي ف وسيه
ولا غره قوة سلاحه
وف قلبه شال القضية
وعشائها سالت جراحه
مش ف الاذعه عناتر
وف الحقيقه بهيه
وب 500 عساكر
هايحاربوا بالبندقية
يابيه هيبتك معاكى
مش ف اللي قادر يموت
ونزولي شايلى عياكى
إقرار (#) ماعنتش_هفوت

.....

النزول مش إعلان حرب
النزول حق مشروع لإبداء الرأي

وليس لتناحر والتعارك

عاشت مصر شعبا

وجيشا

وعلما

شامخا على مر الزمان

مخدوعه

يا حب وأصله فزوره
يا نبض ووهم على صوره
بلاش تتوضي من دمعك
ومهما تنادي مش سامعك
لا فرض يقرب الفرقه
ولا بالسنه هارجعك
على مهلك
وطوفي العمر موجوعه
ودوقي المُرّ ف رجوعه
وشوفي الصبر ولوحذك
رضيتي وعيشتي مخدوعه

25 شارع الثوره

بتنادي مين صوتك ضعيف ؟

اياكشي كفاك الرغيف

وللا الأمان اللي انت متمرغ ف ضله

بدك تخله

وتبيّت الناس ع الرصيف؟

بلدك يا عم الثورجي فيها الزيتون

فيها اللمون

فيها اللي ماليين السجون

فيها المحاجر والحناجر والعقول

فيها اللي الإمام اللي مانام

فيها اللي نام زي اللي قام

واللي غرق زي اللي عام

بلدك مقام مالهوش وليّ
يا ولاد على مات الكلام
والكل متلجم ظنون .
بلدك ماهيش القدس بزياده وجع
بلدك بتحمي اللص وبتضرب ودع
بلدك علم تحته هرم جواه ألم
بلدك بتشحت م الأمم وبتشتري ف المرتجع
بلدك يا عم الثورجي للبلطجي
واللي معاه لو طبلجي
يصبح بحكمة ربنا آخر نبي
بلدك بتكره مذهبي
و بتقول غبي
دي الكوره لسه ف ملعبي
والحكم ف ايدين فرمجي
والعدل سايقه عربجي

تعرف تعد اللي اتحبس
تعرف ترجع مختلس
تعرف تغطي المزبله
وتحط على بابها حرس ...؟
ماتروحش بدماغك بعيد
خليك هنا وسط العبيد
لا فلوس قارون هاتحرك
ولا ثوره تسليحها جريد
بلدك هنا
بلد الرجوله المفرطه
بلد البطوله المحبطه
بلد الحضاره والتاريخ
بلد الشطاره شرمطه
بلد النفاق والشعبه
بلد الكفاح والكهرته

بحبك موت

من أبعد حته ف حضن بلادي بنادي عليكى ..
وبآخر نقطه ف دمي رسمت عنيكى ..
سهرت معاكى ليالى طويله
كنتي ف حلمي عروسه جميله ...
وأما صحيت ؟
وأما صحيت م الحلم لاقيتك قاسيه عليه
ومتحنينه بدمع عنيه لماصحيت ؟
لما صحيت بصيت للبيت
اللي أنا من ثانيه رسمته بدمي
لاقيته خراب
لاقيته سراب
والحب دا غول بيخوفني
لما خطفني بسيف مسلول
فرحت بطعم الحب ساعات

عشت ف وهم الحب أوقات
تهت معاه وسط المتاهات
واهو خد فرحى وساب لي سكاااات.
فى أول كلمه ف أول سطر
فى قصة حبي كتبت بحبك
مش قادر قلبي يواجه حبك
شايفه وخايفه
طبعا عارفه
إن أنا مش قادر اداوي جراح ودواها ف قريبك
ولا فاكدر مره لوحدك كده قولتيلي بحبك
م الآخر كده ؛
لو متردده ؟
لو عايزه وخايفه كلام العدا ؟
ها انده من تاني
هابعد واناديكي .يمكن تشتاقي
لو دمع عنيكى حس باشواقى
ابقى اتقربى . اكتبى واشطبى
وياك تعملى لدنيا حساب . دا أمل كداب ...

کات یوم تنادیني ویوم انادیها
مره تجیني ومره اجییه
وفین ما تکونی هتلقی عیونی اجمل صحبه
بلاش من تانی أحس معاک حبیبتي بغربه
نسیني آلامی وکل ظنونی
خلیکی کلامی غرامی جنونی
خلیني انسی ساعات الوحده
وساعات مباحشش غیر بالنار وساعات احتار
وساعات أسکت بس ثواني وأفکر فیکی
وادی یارب
أنا عایش لیکی
عایش بیکی
عایش فیکی
الله یهدیکی
بحبک موت

محتوى الكتاب

م	المحتوى	صفحة
1	بطاقة الكتاب	2
2	الإهداء	3
3	عدت سنين بُعدك	4
4	شهر مارس	9
5	أم الدنيا	13
6	روبايكيا	18
7	أرض النفاق	23
8	فين الغلط	27
9	متلخبط ليه	29
10	ربك لطف	32
11	هما الكلمتين	34
12	عمى الحب	36
13	كلام و خلاص	39

42	اتخذت	14
46	ماعادش كسوف	15
49	كفاية عليك	16
53	تتجوزيني	17
56	العيد ماجاش	18
59	بدون مونتاج	19
62	قلبي أنا	20
64	تايه	21
66	مع نفسي	22
69	طريق الشوك	23
72	مرهونه أشواقى	24
75	حب أخرس	25
77	صديقهم	26
79	محمد مات	27
84	مايهمكيش	28

87	أنا نازل	29
90	مخدوعه	30
91	25 شارع الثورة	31
94	بحبك موت	32
98	محتوى الكتاب	33